

Cretooryn Mie as Olk

Ealish Kerruish, shenn ven nish, t'ee er jeet faggys da ram sorçhyn dy veiynd fud eash e bea. Aynshoh ta mee er screeu sheese yn chooid smoo aitt as smoo quaaagh jeh ny skeealyn firrinagh shoh, myr hie ad er insh dou ymmodee fastyryn Jedoonee as ee cur shilley orrin.

Peddyr:

Tra va Ealish ny paitçhey va kayt doo lesh lieh-amman eck enmyssit Peddyr, as v'eh er ve eck neayr's v'eh ny phishin. Bynney lhee Peddyr, as v'eh ny hoie dy kinjagh er e glioon as geiyrt urree dagh ooilley voayl.

Laa dy row, as Peddyr mysh daa vlein dy eash, hie eh magh as cha jagh eh er ash. Hirr ad eh dagh ooilley voayl—va'n lught-thie cummal ayns Poyll Roish, as ren ad shelg mygeayrt y steat as ayns garaghyn ny naboonyn. Cha row peiagh erbee er vakin y kayt, ga dy ren ad ooilley gialtyn dy beagh ad er nyn dwoaie er-e-hon.

Cha jagh eh er ash fud ny hoie, ny laa ny vairagh. Lurg shibber, haink dooinney dys y dorrys dy ghra dy row dooag vooar as lieh-amman echey ny lhie marroo ayns y raad er-gerrey da'n thie; smooinee eh dy row eh er ve er ny lhieggey liorish gleashtan. Hie yn ayr as y braar ec Ealish magh dy akin nee Peddyr v'ayn. Tra haink ad er ash ren ad firrinaghey dy nee Peddyr v'ayn, as va trimshey vooar er Ealish. Hug ad lhieu er ash y corp as v'eh oanluckit oc 'sy gharey.

Ny s'anmagh er yn oie shen, cheayl ad kayt pshagey çheu-mooie jeh'n dorrys dooint. Ren ayr Ealish goll as fosley yn dorrys...
...as ren Peddyr shooyl stiagh!

Ren moir Ealish fockley magh, "Oh, Ealish! Er hoh Peddyr nish! Cha nee eshyn hooar ad!" Agh cha row Ealish son jeeaghyn er yn oyr dy row ee smooiinaghtyn dy nee scaan Pheddyr v'ayn.

Eisht ren y kayt lheimmey seose er e glioon as ren eh mooar jee, as va fys oc dy nee Peddyr v'ayn dy jarroo. Agh cha dooar ad magh rieu quoi b'lesh y kayt ren ad goanluckey.

* * * * *

Paddy

Chammah as kiyt, va moddee ec Ealish tra v'ee aeg. Va quallian eck enmyssit Paddy, son b'lesh y lught-thie yn voir echey. V'eh ruggit ayns y thie, as va Ealish feer voyrnagh tra hooar ad kiedoony as coillar noa da. V'eh shey meeaghyn dy eash ec y tra v'ayn. Va graih mooar ec Ealish er Paddy, as by vie lhee goaill eh magh lesh e chiedoony as coillar noa.

Mysh shiaghtyn ny lurg shen, haink van y vuitçhoor yn eill y livrey tra va Ealish ec y scoill. Nish va Paddy as e voir cliaghtit rish fuirraghtyn cooyl y van derrey verragh y buitçhoor daue craue. Y laa shoh, cha row craue erbee ec y vuitçhoor, as smooinee

moir Ealish dy row ny moddee er ngoll er ash stiagh 'sy thie tra hooar ad magh. Myr shen, hie ee stiagh as ren ee jeigh yn dorrysts. Grig ny ghaa ny s'anmagh, cheayll ee feiyr agglagh çheu-mooie.

Ren ee siyr magh reesht, as hooar ee magh dy row yn buitçhoor er nimman ergooyl harrish Paddy, er yn oyr dy smooinee eh dy row eh er ngoll stiagh. By hreih mooar lesh y vuitçhoor, as begin da moir Ealish cur fys er y lhee-baagh. Haink eshyn, agh va Paddy bunnys marroo, as dooyrt y lhee-baagh nagh row veg dod eh jannoo er-e-hon. Baillish cur eh gy-baase, agh va fys mie eck cre cho trimshagh as veagh Ealish tra harragh ee dy-valley as cha beagh Paddy ayn.

Tra haink Ealish stiagh, son shickyrys cha row ee son cur eh gy-baase, as dooyrt yn ayr eck dy jinnagh ad boandyrys eh er ash dys slaynt vie. Dooyrt y lhee-baagh dy row eh smooïnaghtyn dy noghe eh baase, agh va'n ayr ec Ealish feer vie lesh ny moddee, er yn oyr dy boallagh eh troggal brockeyryn shynnagh guaragh.

Ny-yei, hantee eh bio, as beggan er beggan haink eh my laue, ga nagh row eh abyl shooyl rish traa foddey. Begin daue gymmyrkey eh car y traa, agh fy-yerrey dod eh shooyl reesht, as v'eh bio rish tree bleaney jeig.

Va trimshey vooar er Ealish tra hooar eh baase, as cha row rieu moddey elley eck.

* * * * *

Yn Inneen Volvaneagh As Yn Assag Buinnaght:

Va Purt Soderick feer ennoil lesh ny turrysee tra va Ealish aeg, as ragh e lught-thie dy mennick dys shen. Ish, e moir, e braar as e shuyr, v'ad shooyl ec y jerrey twoaie jeh'n ghiau fo'n eaynyn aittinagh, as va çhionnal mooar aynshen jeeaghyn seose.

Ren y lught-thie scuirr dy akin cre va taghyrt. Inneen mysh daa vlein yeig dy eash as e fer-mooinjerey beg (va enn ec Ealish orroo), v'ad drappal er yn eaynyn mastey'n aittin. Va maidjey liauyr ec yn inneen, as v'ee broddey red ennagh lesh. Va'n çhionnal geamagh, "Ny jean! Ny jean! Tar-shiu neose veih shen!" Ren shuyr Ealish fenaght cre va goll er. Ren ad ginsh jee dy row assagyn buinnaght heose er yn eaynyn: Dy jinnagh yn inneen torçhaghey ad, yinnagh ad soiaghey urree.

Agh cha darragh yn inneen neose. Dy doaltattym haink kione mooidjeenagh mooar magh ass towl, as yn inneen volvaneagh broddey eh foast. Eisht y slane assag buinnaght foawragh, cho gial as sniaghtey er y clieau, lesh sooilyn jiarney as birragyn oarlagh er lhiurid, ren ee lheimmey magh grinderagh er yn inneen, ren corlheimyraght ergooyl voish.

Haghyr shoh reesht as reesht, as dagh keayrt doobyr da'n inneen tuittym harrish y vroogh: she reih v'ayn eddyr baase ec birragyn yn assag buinnaght, ny baase ec birragyn ny creggyn geyre foe. As ec y traa cheddin va'n çhionnal jeeaghyn er lesh grayn. Va paart jeu screeagh magh. Gyn ourys va'n fer-mooinjerey beg agglit ass e cheayl.

Ec y jerrey, hie Ealish as e lught-thie ersooyl veih'n voayl—cha dod ad jeeaghyn er. Agh ta fys ain dy ren yn inneen tannaghtyn bio, er yn oyr dy vaik Ealish ee ec y scoill laa ny ghaa ny lurg shen.

* * * * *

Y Roar As Y Cabbyl

Tra va Ealish mysh jeih, ghow ee toshiaght gynsagh roar y varkiaght. Nane jeh ny kied keayrtyr mooie er y raad fo'n dorraghys, haink ee nyn guail paart jeh ny caarjyn ec e braar shinney cheet y bayr elley er ny roaryn oc-hene. Va fys oc dy row Ealish gynsagh markiaght, as myr spotçh ren ad foaddey ooilley ny soilshaghyn-roar oc, as leaystey noon as noal, dallaghey ee.

Va cairt-arran as cabbyl pairkit çheu-mooie jeh thie aynshen; as hug ny guillyn eh urree slewal jeh'n raad as ren ee markiaght kiart fo'n chabbyl as tuittym jeh! Agh va'n cabbyl dy mie cliaghtit rish paitçhyn, as cha ren eh gleashaghey un oarlagh.

Haghyr red cosoylagh tra woail ee noi post-soilshey: lurg shen ren e paarantyn gobbal jee markiaght as ghow ad ny queeyllyn jeh'n roar eck.

* * * * *

Y Roddan Croobagh

Boallagh Ealish goll lesh shilley er ny shenn-phaarantyn eck va beaghey mysh meeilley veih Balley Kew Aeg. Keayrt dy row, tra v'ee mysh shey-jeig, v'ee cosheeaght dy-valley er bayr çheerey. Va fastyr geuree keeiragh ayn. Ec un voayl, begin jee shooyl trooid faiyr liauyr. Dy doaltattym ren ee gennaghtyn red ennagh trome snaue harrish e cass. She roddan mooar lesh un lurgey croghey jeh v'ayn, as farbyl folley ny chooyl: foddee dy row eh er ny hayrtyr ayns ribbey. Tra honnick Ealish y roddan roie ee ersooyl lesh grayn as feoh.

* * * * *

Ny Shligganee As Ny Deyill Feohdagh

Yn startey ec Ealish tra daase ee dy ve ny ben, she goyneydys v'ayn. Va nane jeh ny custymeyryn eck ny ben aeg va cummal ayns Kione Droghad. Vrie ee row Ealish abyll jannoo whaaley son y voir eck va freayll thie-aaght er Shooylaghan Doolish. Ren Ealish coardail rish, as hie ee dy veeiteil rish y voir un oie. Va'n thie troggit jeeragh fo'n eaynyn, as v'eh jeeaghyn dullyr as dorragey.

V'ee er ny cur stiagh liorish nane elley jeh ny h-inneenyn ec y voir, ren leeideil ee stiagh 'sy far-hamyr. Va dagh ooilley voayl beggan neuheiltagh, as tra v'ee goit stiagh 'sy çhamyr-soie, ren Ealish shassoo er red ennagh creoi ren goll frap, frap, frap! fo'n chass eck. V'eh cho dullyr as nagh dod ee fakin cre v'ee er shassoo er, as cha smooinee ee monney jeh.

Va'n çhamyr-soie eer ny smoo dorragey na'n far-hamyr, as begin da Ealish blakey beggan roish my dug ee my ner shenn chaillagh veg va jeeaghyn gollrish buitçh ny soie ayns y chorneil. Ec y ghrig shen hooill ren ennagh mooar harrish cass Ealish. Ren ee screeagh as brebbal eh ersooyl, as dettyl eh kiart tessan y çhamyr.

“Ny jean shen!” ren y chaillagh cliogaratht, croymmey dy hroggal y red. Y keayrt shoh cha nee roddan agh shligganagh keead blein dy eash v'ayn. Hug eh feayght drommey urree, as cha by vie lhee monney fakyn dy row shiartanse jeh ny cretooryn snaue mygeayrt y çhamyr. As ny lurg shen chum y chaillagh heose y veishteig dy voddagh Ealish fakyn ee, as y kione fuilltagh snoggal seose as sheese ayns yn eddin eck.

“Gow cappan dy hey, ghraih,” dooyrt y chaillagh. Dobbyr da shen cur çhingys er Ealish, giu yn tey as jeeaghyn er ny cretooryn blakey neese urree. As myr baare er y chooish, v'eh inshit jee dy nee deyill feohdagh va bee ny shligganee. V'ad çhym saghey ad veih'n eaynyn as lhiggey yn raad daue ayns y thie. Y red ren Ealish shassoo er ayns y far-hamyr, gyn ourys v'eh shen ny gheyll feohdagh. Cre'n aght v'ad abyl beaghey marish shen ooilley? As cre'n aght v'ad geddyn stiagh ny turrysee?

Hie Ealish dys y thie shen ayns y laa lurg shoh, as va aggle eck dy kinjagh dy beagh deyill feohdagh ayns ny h-eaddeeyn hooar ee dy-valley veih shen.

* * * * *

Fynlo yn Eeast Airhey

Tra va mac Ealish, Thom, mysh tree, hug y lught-thie da eeastyn airhey. Y fer smoo jeu shoh ren ad genmys Fynlo, as v'eh ny rap beg. Fer as fer hooar ny eeastyn elley baase, as ta Ealish gaggyrt foast dy ren Fynlo marroo ad ooilley.

Laa dy row, as Ealish caghlaa yn ushtey ayns y doagh, lheim Fynlo magh as huitt eh sheese cooyl y sorn gas. Ren Ealish geabbey tayrtyn eh lesh spein, agh ren yn eeast airhey lheimmey jeh reesht as reesht.

Fy-yerrey haink ee dy ve tarmestit as ren ee greimmey yn eeast ayns e laueyn. Agh va ny smoo na Fynlo ayn: va peesh dy vroid lhiantyn rish, as gyn ourys va shoh lughtey eh, er yn oyr dy row ee abyl cur eshyn (as y broid) er ash ayns yn ushtey nish. Hie eh fo dys y vun, as smooinee Ealish dy row eh marroo. Eisht ren eh gleashaghey beggan, agh va'n broid lughtey eh foast, as cha dod eh snaue. Ren ee geabbey scughey yn broid lesh skynn, as ren ee bunnys yn eeast moal y yiarrey ayns daa lieh, choud as y dooinney eck, va jeeaghyn er ooilley, v'eh gyllagh, “Nee oo marroo eh!”

Fy-yerrey ren Ealish scughey yn broid, as va Fynlo bio ny sodjey na dagh ooilley nane jeh ny eeastyn elley.

* * * * *

Er hoh yn jerrey jeh ny skeealyn. S'treisht lhiam's dy ghow oo soylley jeu.